

列女下

明滕濟姐浦口滕汝明女適上原王復源年二十而寡家貧滕蠶績作苦以完其生嘉靖二十年部使者王瑛上其事詔旌之學博阮文璧嘗爲作歌

阮惜姐陳禹績妻早寡豪有慕其色而強委禽者號哭截髮自誓豪大慙謝熒熒一婦紡績給食備嘗百苦人莫不憐之卒以節終

湯地姐定海人湯橫之女夫湛大澄早卒子靖臺遺腹五月生湯持家訓子備極艱苦子成立又早卒復撫其孫惟

連江縣志

卷之九

列女

一

貞以底有成湛氏一綫之緒綿綿不絕皆湯力焉

趙大主水南鄭世紹妻年未三十孀居貧困不堪自守屬有賄其兄速之嫁者不從後屢迫焉大主志益堅兄無如何以母病爲辭趣令歸寧居數日供具頓異於昔大主疑之力求還鄭兄詭爲送歸令舁以東出及城外不見長江心知其變因詰之始有嫗微道其由大主躍以出碎所乘輿奔回兄家奮擊其廳事什器無遺泣誓曰吾死不窺趙氏門矣攜二子曰倫曰儀徒步歸力紡績以飼後二子克家鄭氏賴之





林惠小中鵠里蘇慶明妻慶明有瘋病不能步林朝夕扶掖之或作痛號呼林輒竟日不食百爲承奉明歿子應庚方四歲林素不識字課庚讀書必令朗誦久之考較章句有乖誤必知之倍加督責庚長入邑庠林後病篤年已六十庚延畫工爲繪容林忽醒遽令婦下帷曰女人無傳面况居寡乎覆面復寢竟不得繪

林慧東岱路頭人高州教諭林望女適宿松令鄭嶧之兄嶠嶠早夭林年二十三撫育二孤誓不改節山藏陳州守議續絃媒至鄭門慰問外婉及姻事林給以密語附耳與連江縣志

卷之九

列女

二

言媒信承以耳因齧之流血負痛逃去自是門絕媒跡以訓子終其身

陳氏庠士游大積妻積以瘠卒陳年二十家貧甚日藉紡績撫子養舅未幾舅亦卒陳殫力營殯母憐其少欲嫁之陳泣曰夫歿兒不卽殉者爲游氏血食計耳忍攜子而適他宗乎母見其不可奪從之竟以節終

林淑珍孫逢曾繼室年二十而寡遺子成祖甫兩月矢志自持閨門嚴肅崇禎丙辰間旌表

劉玉小陳天秩妻秩早死家徒四壁遺腹一子劉盤錯苦



守以終其生後其子有成天啟間詔旌之

孫玉潤庠士陳喬桂妻年十九夫死卽不欲生忽自計有遺腹姑待其後及育而男遂勵志守節其子克有成立崇禎丙子間旌表

孫靖小陳英妻年二十六英卒子長謨生方五閱月孫事舅姑盡孝身受凍餒撫其遺孤舅姑歿竭力營葬貧不廢禮

國朝阮氏保安里陳時寅妻年二十七喪夫子方五歲家有遺產盡爲其從姪侵蝕阮貧落失所嘗爲人傭作以養

連江縣志

卷之九

列女

三

孤姪復迫之嫁阮謝曰吾卽餓丐亦可生終不出陳門也歷苦節數十年卒

王芝小保安里陳堯文妻年二十二夫病糜股肉療之稍間復篤勢不起乃引刀斷一指爲信及遺腹生子勤劬以撫上奉舅姑膺濡無缺養歿則負土營葬族里稱孝其子年二十而夭閉戶孀居以終餘年

鄭金小安德里楊弘楨妻年二十五喪夫遺子方數月時值亂離家業凋零決志存孤周旋兩遷之間終不變節

王錦姐東村林日至妻年二十七而寡子方二歲其兄欲



奪而嫁之持不可時舅姑年老計婦爲兄蠱終不自堅常患焉王因謝絕其兄無得踵門矢死不歸寧歷節二十餘年如一日云

陳氏陳資生女年十七歸孫斯若甫二載而夫卽世有遺腹生子朗人形影伶仃獨立支持家不至中落子長游庠倉庫筦鑰尚在其手旣而得四孫朗人亦逝陳雖老而教育諸孫猶鞠子也持身至嚴堂階不輕下閨流慶會雖至戚未嘗預年八十餘郡守顧焯旌之方朗人在時與婦吳氏敬事其母陳意少有拂輒堅卧不起朗人與吳必跪牀連江縣志

卷之九

列女

四

下移時俟意解乃興故諸孫皆式其孝此天之所以報貞節也

李氏長樂小址李用律女也小址濱海

國初遭紅巾焚劫李父母不受辱罵賊死李方七歲被掠登舟轉入連江界鬻身民間年十五諸生陳際時娶爲側室警敏而淑姑黃氏性卞難事於婦吳常齟齬不休李至顧當其意然外順其姑陰爲嫡調護曲至家用以和年二十二際時卒遺孤仕晉稚方齷其舅猶在堂謂李年方茂終必去手營壙葬際時夫婦獨不爲旁壙以待耐者李泣



曰翁固疑我不能守乎我有孤卽不能立義亦豈負亡者  
奈何哉不爲我地旣而居舅喪祭葬如禮皆出其力孤長  
督令從師向學卒成名士

葉貴小嘉賢里人保安黃肅寧妻年二十八夫死子方七  
歲其祖姑老而失明顧以貧故欲嫁婦以自資葉不從猶  
不爲信中夜伴爲男子者拊婦體試之葉驚呼以起旣乃  
知其祖姑也時拮据易斗粟爲饘粥奉老人自啗者糠粃  
而已晚發癰疾誓不求醫及危篤其女曰吾母終死於斯  
寧一決也遂剖之立愈歷二十餘年

連江縣志

卷之九

列女

五

孫氏吳聖功妻也聖功天年二十四孤方四歲門衰產罄  
無可恃以守製絨爲花貿米哺雛甘茹糠菑鄰有再醮婦  
見其貧不嫁哂之徐諷曰諺亦有言絃斷絃續胡不細思  
荅曰此無恥婦所爲我生於儒門素秉風教庸事此乎自  
是絕不與語貞潔性成斗室自居而几席振拂無纖塵衣  
裳楚楚不受點污知命能安雖憔悴至老無有怨言

周招小積石邱景祥妻以調遷從夫寄食羅源几鋪結茅  
以居夫死於虎周年二十五子方六歲搖搖孤影側立他  
鄉又兩經徙復挈其雛間關展轉卒能完身保孤挺然自



立歷四十載而終

游靜莊庠士林大偉妻也幽貞天植歸林能執婦道年二十六夫歿以撫孤爲任孝養舅姑如夫之存孤名煊稍長教之有方進於儒雅治家肅慎內外型之

吳氏仁賢里張克章妻年二十二夫死欲引義自裁哀遺孤匍匐無可託者遂勉持門戶育子圖成子警文長而婚娶無何亦夭婦

葉氏年方十八遺孕四月婦姑相對慘泣已而生男紹康兩婺協力撫之得延其世數十年翼卵完巢兢業畏懼人

連江縣志

卷之九

列女

六

以爲難

吳舉官保安里林紹妻年二十二歸於紹逾二年紹漁於海遇風溺焉遺子方週歲素乏升斗之儲傭織繼爨勤哺幼孤居無屋宗人重其義以祖廟寢室使母子託處之窮老慘淡安其遇不悔

林氏東山葉德介妻寡居時二十七歲家貧其伯姒利嫁婦金數窘辱之使速去林持義屹不可動卒以完節每見鄰婦有艾而寡者常慰撫而扶掖之惟慮其不得全也自念嬰患志在立人此尤節之卓者



李氏林兆盛妻年二十八兆盛卒遺孤紹宗三歲或計其貧無粒粟必不能守以微言嘗之李抗聲矢以大義說者逡巡而退伯叔以爲賢歲予蒸嘗之餘數石資之然母子不得兼贍而糝羹獲繼卒保其孤則刺指之力多也卒年七十有二

黃氏丁兆章妻夫亡時黃年二十有五長子廷焜八歲次七歲少者生逾二旬家貧無資自力女工易粟而食督其子樵採供爨捋茶蓄租漸而自完舅姑之喪久在淺土卒擇地以葬廷焜長娶婦未幾卒婦

連江縣志

卷之九

列女

七

黃氏亦二十五歲而寡生男二十九日復持大節不渝其志事姑以孝聞邑令彭之曇並旌焉

鄭氏諸生陳獻琳妻生三男而獻琳卒鄭年二十四矢志不移營葬舅姑如禮卯翼二孤遊庠康熙五十二年旌表載在通志

林氏張茂榕妻榕少習儒業遘疾而夭其母年老林方十有九齡身遺孕三月誓舟勵操奉姑朝夕及孤子生鞠而迪之終立其家

吳良慈諸生吳鏐女也年十八歸陳焜未踰歲夫病吳侍



湯藥不少怠及亡吳志於殉死時已有身其家人勸曰死非難而存孤尤大節也既而生男成祖因鞠育之期其成稍長愛而能勞無使踰禮親秉家政風範凜然年踰五十得疾成祖進藥却不服曰吾所以不卽死者若未立故也今得有辭以下報地下相從固晚矣藥奚爲者竟卒

孫氏南山鄭起朗妻年十七歸鄭二十二喪其夫時遺腹僅三月家貧不欲易操迨育男子勤於培植志節挺立天性然也

黃氏陳錦之妻年十八而嫁不二載錦卒身有遺孕哀慟

連江縣志

卷之九

列女

八

欲引決其舅姑皆老慮無依以婉言勸之且曰若幸生男卽吾兒猶不死未幾果生男家貧勤針黹杼機支撐竭力以立其家

吳昆瓊陳汝垂妻年二十汝垂卒遺孕三月及生男名繼祖撫而勤於教復以力學嘔血死婦周氏吏部主事周懋勲女年二十六而寡姑婦冰玉相依並貞比潔云

董氏龍塘人年二十適林高甫方朞而夫歿遺孕八月夫翁年六十餘痛失子晨夕哭泣董銜恤茹哀反曲爲堂上譬慰未幾生子以寬翁隨卒鬢而將事經紀秩如遺田僅



給衣食以儉勤無隕其業

薛氏積石邱禮光妻年二十五而寡薛有遺孕數月誓生男則爲夫存孤女也則死及娩而男遂以延祚自任提攜訓誨以母兼父論賢徽者推之

朱氏浮曦許永春妻喪夫時年二十有四遺腹生一子鞠育甚勤長爲婚娶幸血胤有繼無何夭如其父乃與嫠婦窮廬對守相依待亡衆皆嘆息稱義

陳氏易世瀚妻年二十六夫卒貞志不改家無強近之親內外事獨肩之及遺腹孤生鞠養惓惓家遂以立

連江縣志

卷之九

列女

九

王氏楊君輔妻年十六而嫁十七喪夫時有遺孕數月矢志守貞子生恩勤閔鬻翼之使長端莊靜一族里引重吳氏諸生林雲程妻年二十三雲程以力學病卒未有所育獨遺孕在懷矢志立節及孤育眦勉提攜卒衍其胤衰門賴之復振

王氏馬凖陳升之妻年十九升病篤數以婦爲慮王指心以死守許時有遺孕踰數旬而生男遂竭力哺字後子復夭仍撫其孫

滕氏浦口程永受妻年二十三夫死遺孕初三閱月誓不



別調待孤之生旣而育其子傭力贍養以一婦人獨任焦勞凡數十年

潘氏保安里陳光庭繼室光庭餼於庠而卒潘年二十五遺腹有子勵志立節教以父書長成其學亦遊黌序卒年六十有二

卓氏趙秀卿妻年二十七夫卒遺孕五月慷慨任重及生殫勞育之搯守堅定終始不變

何信小年十六嫁陳開淑十八夫死遺孕不數月貧無立錫開淑故籍漳浦又乏周親扶恤人以守之難諷焉荅曰

連江縣志

卷之九

列女

十

吾當爲其難者子生撫之以長辛勤締造其家用成卒不負所言

孫福姐章作彥妻年二十二夫死以有遺孕冀生男可恃以守旣育而女悲泣不欲生衆婉導之因鞠螟蛉爲嗣終無他志

林順姐寶溪周峻伯之妾峻伯死母垂耄在堂林年二十八誓不改嫁與嫡鄭氏左右孝奉其姑下撫八月孤子同心弁命事居途往以節孝傳

楊氏進士邱允通季子婦也夫欽士病瘵數年掖扶卧起



手治湯液窮晝夜無間家貧不給藥數截髮鬻於市夫死楊年二十四斗室磬懸內外莫爲顧恤者獨撫二子持始終大義孤穉不能爲生楊日勤針刺夕則乘月影壁光爲人補綻以資升斗旣而子夭重陰積晦饑憊終身卒年六十有七

林氏夏津令孫志仁長子漢廣之妻漢廣早卒林年二十二時夫翁未第家貧遺腹方三月及娩生男檉誓爲孫守稍長使依翁官舍以學已獨家居熒守雖有繼姑不出閫遠從也後檉以例爲永定司訓

連江縣志

卷之九

列女

十一

王氏諸生劉峻妻峻篤行能文旣得餼以勞嘔血卒王年二十七撫一男一女以守素貧不能儲粟日以女工所入供食集枯茹苦泣持烟帷訓其孤子儀範肅然

孫宜閨舉人孫璋之女也初父母僅生一女珍之如掌珠歸安定鄭家樑亦故家子而貧落不能振孫盡脫簪珥資之藜粥布素恬然自安年二十五育二子一女而家樑卒孫秉操稱未亡人以勤鞠子以禮自閑素知書屏不寓目日寡婦無事此也鍼管之事老不去手端莊矜肅閨秀以爲風範



陳氏儒宅黃孔容妻年二十七寡子方七歲姑年邁七十婦去則旦夕無以生陳爲亡人任老母兼哺幼孤勤苦節縮乃完婚娶未幾天呼天泣曰黃氏血食竟斬於是吾胡以生爲雖然有幼婦在不可不延喘以堅其志婦某氏亦以節立

陳應官積石邱懷玉妻年二十四而寡遺子二俱在孩抱陳斂跡深閨焚脂却粉撒珥燬簪終身不與妯娌慶會二子長而生育雖舍館弄孫笑未嘗至矧卒年五十五

鄭靜姐陳志超妻年二十三喪夫遺子永璋在襁褓中食

連江縣志

卷之九

列女

十三

貧勤哺稍長督以力業遂完其家素嚴謹持身老無踰禮永璋事親能孝處鄉黨以敦厚稱蓋母教云

張艷姐劉德俊妻年二十七德俊卒子大綸方三歲張一志撫之事姑鄭氏尤謹大綸長而孝於事母蓋苦節而終食其報也他又

江氏謝少峯妻年二十四寡八十二卒歷節垂六十年

林氏陳思全妻年二十一寡孤方八月歷節六十餘年卒

趙士錦楊茂聯妻年二十八寡撫孤三人歷節四十六年

董氏坑裏謝士晃妻夫丙申死於寇董年二十七撫數月



孤以守歷節五十五年

陳聚小保安庠士張日榜繼室年二十寡事翁撫幼子并為嫡子婚娶嫡子天婦何氏年二十八亦寡兼撫其孫歷節三十四年卒

吳桂姐張文志妻年二十七寡撫孤以守後天復撫其孫歷節五十餘年

范氏保安里陳堯能妻年二十八寡歷節五十餘年卒長婦孫氏年二十四亦以寡守卒年七十餘

黃氏陳德老妻年二十四寡八十三卒

連江縣志

卷之九

列女

十三

黃氏保安里陳俞玉妻年二十七寡子方六齡歷調遷苦守卒年八十六

王招姐陳倍吾妻年二十三寡歷節六十五年卒

張祥官保安里陳上游妻二十四寡撫孤成立餽於庠其孫帝眷亦庠生歷節六十五年卒學使旌以女貞不爽

孫氏庠士熊元鼎妻年二十九寡事舅姑撫二孤子歷節四十餘年

黃氏浮曦吳學文妻年二十四寡歷節五十年卒

張氏積石吳士卓妻夫客死吳下張年二十一子方週月



勤植以守歷節五十年

楊氏林兆泰妻年十九寡撫三歲孤以守孤天又撫其孫  
歷節六十餘年卒

陳晉姐武舉人孫平妻年二十六寡撫二孤歷節四十年  
連居安山藏林允發妻年二十寡撫孤天經年八十一卒  
黃氏溪尾陳存質妻年二十七寡歷節三十四年

陳奇姐辰山黃在中妻年二十四寡撫二孤歷節五十餘  
年

陳氏東岱林能泰妻年二十五寡歷節五十四年

連江縣志

卷之九

列女

十四

朱氏青塘黃有才妻年二十七寡撫子又天與婦共守卒  
年七十三

劉氏青塘陳德清妻年二十七寡孤尚河方七歲女在抱  
尚河長遊於庠其女死烈劉卒年六十四

梅從姐陳子壽妻年二十五寡八十五卒歷節六十年

林聰姐伏沙黃芹卿妻年二十六寡卒年五十一

林求姐鄭震妻年二十四寡撫孤亦天與婦俞氏共守歷  
節垂五十年

楊氏陳而章妻年二十二寡撫二孤長方三歲次以遺孕



生歷節三十五年

鄭氏幕浦柯國佐妻歷節四十四年卒

林氏坑裏謝子黽妻年二十六寡歷節三十餘年卒

歐氏梅大年妻年二十七寡五十八卒歷節三十餘年

陳氏孫承禧妻年二十四寡七十九卒歷節五十五年

何氏東岱繆用霖妻年二十六寡孤庠士暉方四齡女生

五月撫而教之歷節三十六年

邱氏東山陳有翼妻年二十六寡歷節四十五年卒

黃安小保安里陳綱妻年二十七夫病篤剪辮付之黃決

連江縣志

卷之九

列女

五

於存孤歷節垂五十年

陳瑞小保安里鄭才生妻年二十六寡歷節垂三十年卒

林氏鄭齋妻年二十五寡敬奉舅姑撫子以守歷節四十

年

秦滿姐陳志奇妻年二十六寡歷節四十餘年

鄭氏卞成允妻年二十六寡撫五月孤十三歲而殤歷節

四十餘年

羅氏大塢林鍾捷繼室十八寡歷節四十五年

陳氏幕浦余成俊妻年二十寡撫二孤歷節四十年



陳氏東湖鄭瑞生妻庠士大澤母年二十二寡男四歲女  
方週歲事七旬老姑撫子歷節三十餘年

彭氏陳文蘭妻年二十寡撫週歲孤歷節五十餘年

陳端小安德里楊叔楨妻年二十四寡孤于京方三歲撫  
之以立歷節四十餘年

陳氏建陽諭陳道峻妹寶溪林昊子妻二十七寡事姑撫  
子歷節垂五十年

黃靜姐青塘張嘉祥妻二十二寡撫四歲孤歷節五十年  
陳氏東岱林能挺妻年二十六寡卒年五十二

連江縣志

卷之九

列女

六

林氏坑裏謝子方妻年二十九寡歷節四十餘年

林氏百勝陳如通妻年二十二寡歷節四十餘年

林懿德陳而輝妻年二十一寡歷節三十六年

謝氏東岱林惟月妻年二十二寡歷節三十五年

林氏浦口鄭賦玉妻年二十八寡歷節三十餘年

王頤姐王庄林魯士妻年二十八寡歷節三十餘年

鄭氏林成棟妻年二十七寡歷節四十餘年

陳奕姐水南趙克修妻年二十七寡歷節三十餘年大憲

爲之題旌



謝氏東岱翁士義妻年二十寡歷節四十年

楊氏陳馨若妻年二十五寡歷節四十年

葉氏安定里鄭家望妻年二十三寡卒年七十有五

胡氏山藏陳異木妻年二十五寡歷節五十年

孫氏陳子安妻年二十四寡歷節六十年

陳氏鶴巖林子富妻年二十四寡歷節三十年

游玉小浦下吳應聘妻年二十六寡卒年五十九

孫超姐陳祥英妻年二十八寡歷節三十五年

劉氏林大儀妻年二十六寡歷節三十餘年

連江縣志

卷之九

列女

七

黃氏陳欽若妻年二十五寡歷節垂六十年

田氏青塘黃大昌妻年二十八寡歷節五十六年

魏氏趙功寅妻年二十八寡歷節三十年

陳氏中麻林義粲妻年二十七寡歷節三十五年

夏氏鄭翥妻年二十三寡歷節三十五年

鄧氏安定里鄭邦煙妻年十九寡歷節三十五年

滕氏東岱翁達行妻年二十七寡撫三孤歷節四十五年

陳氏吳益占妻年二十二寡歷節三十餘年

傅氏庠士傅廷沂女吳希攀妻年二十七寡歷節三十年



林氏鄭植妻年二十二寡歷節四十餘年

周氏新洋陳時照妻年二十六寡歷節三十餘年

張氏詞臺劉尚永妻年二十八寡歷節三十餘年

鄭氏趙時文妻年二十八寡歷節三十餘年

陳保小積石薛士禮妻年二十四寡歷節三十年

孫氏林光福妻年二十三寡事老姑撫週歲孤以守歷節三十餘年

林珠姐山藏陳宇元妻年二十一寡撫二孤歷節五十年  
李氏鏡路鄭時凱妻年二十八寡歷節三十餘年

連江縣志

卷之九

列女

六

張氏庠士陳廷枝妻年二十七寡歷節三十五年

馮氏山藏陳理玉妻年二十九寡撫二孤歷節三十七年

陳氏青塘李士開妻年二十八寡撫三孤歷節三十五年

邱進小保安里林文煥妻年二十六寡歷節垂五十年

陳玉姐保安里陳鎧女王周中妻年二十五寡撫五歲孤歷節三十餘年

滕氏陳祖望妻年二十九而寡撫子沆成立歷節三十載

連氏二十六都林經訓妻年二十五寡歷節垂三十年

孫氏楊元五妻年二十六寡撫二男一女歷節三十餘年



林氏陳有敘妻年二十九寡撫六歲孤歷節三十餘年

張啓小保安里陳鳴禔妻年二十九寡歷節三十年

黃和小建興里葉森然妻年二十九寡歷節三十餘年

蕭真姐安德里庠士王大元妻年三十寡歷節二十餘年

葉梅吉保安里陳公論妻年三十寡歷節二十餘年

張氏林朝宜妻年十九寡歷節四十餘年

鄭氏吳翰占妻二十八歲夫卒歷節三十餘年

論曰人之所難自立者節也而閨中弱質恆優爲之彼其習靜居幽非若士人之借詩書以泳陶得友朋爲宣導者

連江縣志

卷之九

列女

九

也而動乎天原乎性履大變而肫誠不易率能盡分義於固然則世之言異悞者輒曰婦人女子豈通論哉滕濟姐以下百數十人自明代迄茲媿芳匹美莫不揚魯寡之風勵高行之志乃至席門塵甑孑影寒栖而身與壁從碎寧共碎或亦邀悔禍之天以倖全無故嗚呼可不謂之傑特者與古人有言死者復生生者不愧其必在斯矣

明許松姐定海人許元宴女年十七歸陳博善事舅姑以孝聞姑病三年許竭誠奉養祈天減算博善亦罹重病許兼事至忘寢食姑卒鬻衣衾營葬具嘉靖四月博善病亟



臨終語曰若未有子當自便許撫膺慟哭蓋棺後卽自縊  
死年二十二巡按白賁憫其節賜柩仍扁其門曰孝義  
謝清小下與朱英妻英七歲喪母性嗜學常負笈邑中年  
十九娶婦未一月復就外傳竟夭死謝歸僅八閱月孝謹  
溫柔家人鮮見其面并不聞其聲英歿卽自經繼姑覺而  
救之却水漿不進三日其母來視因以所遺服飾令與姑  
中分之隨乘間登樓縊死

傅夏姐定海人鄭邦槐妻崇禎間夫質於寇傅漚麻自給  
久之人言夫死傅方對衆績麻斂而墜淚曰吾何用生爲

連江縣志

卷之九

列女

二十

遂入室自縊傅生平無盛喜亦無遽怒所居近佛寺終生  
未嘗一至

國朝何長妹定海所何懷正女歸李大妹雅嫻婦道順治  
庚戌大妹爲寇所殺何聞遂自經死

陳凝淑生有姿容適集政上里林挺梅子夫牧豎耳未一  
歲死貧無以殯哭屍旁三日夜殮畢投繯死

陳英穎庠士陳啓震女嫁劉以水夫死穎慟絕求死母始  
泣解曰爾有遺腹盍稍延爲夫血食計乎乃忍痛自寬然  
殉夫之志不一日忘也迨脫盆聞生女拊牀大慟卽閉目



不食七日強起理妝謂母及姑曰郎昨夜來覓兒當與母  
姑永訣矣愧爲女爲婦未成無以報德言訖而歿

吳珠官保安里人年十九歸陳新蘭逾年生一子新蘭以  
攻苦得疾久益篤屬續之頃吳搏膺呼天絕復甦欲以身  
殉舅姑懟曰吾老何需惟是藐諸孤今以屬若如之何其  
死也及旬始進湯水旦夕抱其子哭於柩再離寒暑常若  
初亡一日子患疹吳泣曰未亡人所不死者以有此子也  
若朝亡之我必夕亡旣而子果殤吳因仰藥且咽金皆不  
得死於是舅姑知之備爲之防復不敢傷老人意姑忍之

連江縣志

卷之九

列女

三

勉爲視息然鷄骨支牀衰颯之氣如嚴冬未幾而病進以  
藥餌麾不視曰兒數年求死不得今期已至奈何後之哉  
及憊出其鑰予母啓篋身內外所需咸備惟曰兒所少者  
雙屨耳蓋吳志於死故諸身後具皆預自治嘗以紅綃製  
屨姑窺見疑爲嫁衣裳吳聞之恚立焚之故至是以作屨  
囑云卒年二十九

孫引小洪塘孫可任女年十七歸大輿林增慶纔兩月慶  
以業漁溺死孫矢志自裁以夫喪未理至終復盡哀致祭  
入夜理服嚴妝以大帶繫竹椽死事聞邑令徐甲第判之



曰少婦堅貞新孀烈節孤鸞隻鳳實邁軌於燕門冰操筠  
心洵標風於鼇水因率紳士造其家祭焉

吳欽順庠士吳旭之女也少事母盡孝長適孫晟僅月餘  
晟得隱疾順禱天求代忘寢食事之數閱月晟竟不起順  
一慟而絕家人力救之得甦於是却妝減膳柴毀骨立及  
周歲竟死彌留時氣息奄奄父呼時惟囑與夫合兆而已  
鄭定姐松嶺黃正旭妻旭父雲生與鄭父道熙幼同學因  
指腹誓婚歸黃僅一載旭得癆疾鄭罄簪鈿爲醫資不效  
遂顛天割股亦不效因復割肝肝進旭始有瘳旭病久多

連江縣志

卷之九

列女

三

躁怒處鄭恆不情鄭安之無怨康熙丙辰五日旭病復熾  
鄭樵悴七日夜不進一粒姑勸之荅曰郎劇如此何心乎  
旭死整妝跪縊柩旁家貧不能殮鄰里義而助之邑令徐  
甲第給扁以旌

王穎姐積石邱卞玉妻年二十九喪夫未有兒息親伯叔  
子又無可爲嗣者因決計死家饒奩具悉付小叔宸玉以  
他日嗣續之事託焉遂絕粒不入勺水其母力止之且防  
之密王不得已謬爲自解食飲復如常母因不疑乃乘間  
縊死



吳梅姐浦下人嫁東湖鄭亨泌甫一歲亨泌病卒自念無子欲守無所恃賴執夫喪歷旬日闔戶投繯以死時人有詩弔之云尺繩名義留千古兩柩幽魂對六時門外一泓湖水碧春來曾照舊蛾眉

吳玉小東塘吳擎甫女性嚴肅諸姑姊妹羣集衆喁喁諸笑獨毅然自持長適幕浦余玘家貧吳安焉曰吾生而貧者貧非所病也未幾玘患瘡醫藥無療及劇吳涕泣誓殉玘慰之曰若自爲我家婦食貧良苦或者天終憐之俾有後甘乎吳泣曰君死妾安得甘吾死決矣玘逝吳遂以鎌

連江縣志

卷之九

列女

三

鋸喉血噴湧濺地衆抱奪之不得死然竟剪髮絕粒示不可生獨冀其父來一訣父知之未遽往將少遼緩平其氣庶幾不死逾三月不得已一視吳聞父至欣然易服出曰兒不孝不得終侍老父將自此從余郎地下矣是夜卽所剪髮絞爲繩距戶自經覺而氣絕時年二十有四云

王敬姐定海人遷居郡之南臺歸諸生傅巖踰半載巖以篤學成肺腑疾盡脫簪珥資醫藥每夜祈天請以身代已而巖疾益甚自知不起念未有子微以言嘗婦對曰固也妾敢以無功傅氏之躬朝夕爲尊人累哉雖然妾必不負



君巖踰月卒是日王於一慟之餘悉舉篋笥中藏授翁爲治喪計曰必如禮旣斂還戶內寂然無哭聲也先是王將嫁備繡屨絳色者十餘嫂笑曰何庸多乃爾能著之盡耶王私訝爲不祥至是述其語於姑且嗚咽曰噫乃卒如嫂言姑疑之然猶以爲兒死婦稱未亡人不復著絳故云爾而不知婦已志於殉矣明日薄暮翁自南臺至與之相對泣因問父母起居訖命弟外宿及晨家人皆起遽呼婦良久不應抉戶入視已自經氣絕面向卧內儼然正立也時年二十有一

連江縣志

卷之九

列女

三

張秀姐張應棟之女年十八嫁於同邑何一驥仲子良鵬未踰年夫病篤微探之張指天曰天平其知我心哉夫歿卽欲自盡伯及伯姒止之曰吾有二子次當爲爾嗣容稍解未數月嗣以疹殤張泣曰吾命也胡以生爲伯姒以有胎告且曰幸而男爾嗣尚在張曰已育者如此未育者安知遂於是夕自縊死

陳銀宋青塘人生五月而孤其兄尚河方九歲母劉氏守節撫之幼讀書習字頗通聲律年二十歸於飛石黃爾旦子金榜榜婚數載而夭陳痛未有子姑翁諭以祭奠需



人不卽殉勉立終制三年數以死與母訣母以身爲諭曰  
盍守乎陳曰母寡不死兄在抱也兒奚俟哉已而作詩云  
兒生半歲父沉舟母守孤貞備百憂孝養有兄兒已矣從  
來忠孝難兼優對燭揮毫從容就縊

吳碧蓮浦下人父早喪與母紡績爲生性矜嚴目不流視  
動無挾輪歸林步苑初生一女而夫病肺萎度不起語曰  
吾止於是家貧若當自爲計吳曰君死妾死奚計乎夫曰  
如幼女何曰俟脫乳可耳無何夫斃時女方四閱月吳具  
殯如禮惟棺於堂曰以待妾偕行也家人慮其死左右以

連江縣志

卷之九

列女

三五

防吳曰無庸旣與亡人言之今固不得死迄踰年女周歲  
有奇脫乳矣乃曰此吾踐言時也欲投繯其姑常與同卧  
起不得間忽計曰何必是遂市砒嚙之及家人覺急取藥  
爲解噤不受計三日乃殂臨卒語曰叔窘甚吾衣無過三  
五襲斂手足形斯已矣亟與夫柩合以埋毋令久頓言訖  
而瞑

鄭氏會城人歸於山藏儒士陳莪莪家貧舌耕以養親鄭  
勤女紅佐之相得甚歡康熙辛卯莪遘疾死於學舍鄭痛  
哭語舅姑必相從泉下舅姑曲解之服喪越四十餘日卒



投繯死時年二十三

林氏邑中林某女許嫁新安里館頭鄭若五子家貧以漁爲田康熙庚子林始歸鄭未踰月夫病牙癰就婦家延醫治之弗效辛丑正月卒於邑林數欲死之父母力勸終不聽踰月扶櫬歸促翁營葬地速爲掩埋及畢告曰亡人得安土未亡人亦從此逝矣遂自縊

董合珠吳雲達家婢也嫁章學閔貧而好賭蕩然不自聊一日取薪給爨入深山中思之計窮就樹縊死董延佇不歸徬徨號泣然莫知死所數以傭力取直僱人迹之無所

連江縣志

卷之九

列女

三

得逾二年有樵者聞鬼哭聲尾之見屍已化闌珊遺骨旁著雙履歸輒語人以爲異事久之聞於董董曰得非吾夫乎亟往視其遺履果手製也躬拾骸掩埋招魂哭祭畢是夜縊以從

林祥姐林澣之女也年二十五適孫成梁梁素有血疾合卺不兩周病亟林極力湯藥間不得效康熙庚子冬竟天林卽有殉夫意以腹中一線垂育隱忍待之然數絕食徒存殘喘及辛丑二月而媿母在旁徐問曰男乎母曰女耳林不應起披衣一慟而絕年二十七



楊愿官安德里楊伯實女嫁林鳴瑜家貧相敬如賓未幾夫嬰疾及篤曰我死爾無子將若之何楊曰倘不諱妾必不獨生夫曰雖然我之貸於人者多死則負之不畏愧地下乎楊曰無慮也須盡鬻田廬諸敝器以償乃死爾及夫卒畢如其言遂爲殉計前數日歸寧父母談笑辭別訂以死期人或疑其妄已而不爽時以爲慷慨從容兼而有之陳梅姐集政里謝守巖妻年二十五歸於謝逾年育一子又逾年夫病陳晝夜奉侍湯藥不痊因刳臂肉糜以進終莫能救將自裁諸姑妯娌咸集再四解之佯許諾視夫殮連江縣志

卷之九

列女

三

畢投纒房中

侯月小保安里陳滿仲妻年十八而嫁逾歲夫貸於族人玉律者商於浙溺水以死初風聞不以爲信及夫弟獨歸侯泣曰吾無望也夫其舅姑欲嫁之侯執義不可延玉律告曰夫負債矣氏卽失身終不償冥冥之中志此高義須夫婦以來生圖報是夕自經死

林玉姐林向生女少依寡母以禮自閔年十九嫁館頭鄭鴻甫成婦六月鴻得疾林宛轉扶掖拊肌舐血及卒痛哭誓從家人勸止之水漿終不下咽越六日自縊於柩旁



楊氏吳秦士妻也秦士歿未有子一女方五歲楊決於同死夫殮畢遂自裁以從方欲死時語女曰吾行從汝父地下汝生非男何時以長須明旦當攜汝偕行也越日其女無病卧牀而絕異矣叔姒

孫氏秦士翁光士之妻秦士死兩年光士繼歿孫氏亟欲殉之姑及諸姒防閑甚周孫陰取竈下刀自剄流血數升喉不斷閱兩日至夜半以剪刀斷喉而殞其性堅忍如此陳氏定海張孝美妻夫死陳年三十有三家貧未有子罄將簪襦具殯殮既蓋棺閉門取所藏砒服之有頃毒作家連江縣志

卷之九

列女

三

人惶遽求方以解麾不受曰吾志已遂無相困也遂卒

吳氏塘下楊永相妻永相故黃頭郎逐漁利溺死於北茭洋吳聞訃絕食覓夫屍期瘞埋乃殉踰月屍不可得痛哭自經死年方二十有五

鄭氏東湖人嫁小滄吳國言夫婦夙相敬愛國言病故數畝足自贍鄭痛絕未及視殮經於屍側

陳蕊姐山藏陳御發女嫁林宗琰倡隨方四年夫死陳哭語家人吾必不使死者煢煢地下毀容絕食執喪七日遂縊以死



王日姐集政里王思增女年二十適林尚燦無所育逾六年夫病故王決計從死其嫂暨諸妯慰譬百端終不聽投繯而卒

孫氏東岱翁士達妻年二十歸翁二十四夫卒孫竭力治周身具爲位設奠如禮明日客弔於堂婦閉卧內經死矣陳住小茶隴農家子也年十八適邱儲孫輝南艱於嗣以伯氏三男爲子乾隆三年輝南病故陳閉戶經衆覺救甦婉諭之因稍進飲食越五日竟縊死年三十五

論曰爲婦者不幸而喪所天敦如存之誠卒未達之志

連江縣志

卷之九

列女

三

勉終生其正也殘其軀而於死者無所濟君子不謂義也然決於一往率所見而不昧其心則魯文伯之內人三皆自殺而渡河之感身赴狂夫蓋亦有焉是以舍命之貞芳閨接軫同穴之信華戶追風錄行者斯亦不遺謂足愧乎無恥而倖生者矣至夫時際所極或遭禍彌深欲立無從他圖不可度勢揆形方與匡海金川慨然同嘆於斯之日誠有以身致而事完者豈不爲光明之槩哉

明林順德河池知州林金女許配孫夢弼嘉靖庚戌孫夭死女年十九從父任通山一夕夢孫來訣寤告其母亡何



訃至卽其日也女聞之慟絕乃素笄縞衣苦塊而坐泣告  
父母曰亟歸兒使得臨夫柩猶可延命須臾父母爲治裝  
具附太母歸遇宿所輒哭如奔喪儀至夫家先謁宗祠舅  
姑禮成然後望几筵而拜悲不自勝蓋不膏沐茹葷者三  
年焉旣免喪周旋親長間益敬處家人皆有禮戊午姑病  
亟齋食顛天竭力調護姑得愈當道爲之疏云奔未面之  
夫喪苦冰霜而誓死不二執無子之婦道甘藜藿而孝養  
無虧萬曆癸未旌表

陳聰小保安里陳邦權女許配黃應龍年十六聞夫訃泣

連江縣志

卷之九

列女

三

曰夫死姑誰養姑劉淑眞蓋黃縉之妻早寡撫其子以立  
者也陳因遂欲奔喪母止之引刀欲自刎母不得已與偕  
行至黃家哭盡哀易服拜姑遂不歸母家與姑同寢處兩  
痿煢煢形影相弔凡日用器物終世不與人共一日小叔  
動其頰巾立碎而棄之嘗負姑避倭入縣至林貞小順德  
家見几上有詩謂林曰聞詩能生情大姐何須學此林悚  
然服其言姑亡築墓以夫祔焉陳亦隨歿萬曆十六年詔  
與其姑並旌家貧不能葬閩縣董應舉助成之且請於兵  
備使者呂純如表其墓

附董公荅蕭連江啓畧云蓋聞貴  
治夙被仁風有陳貞女之貞有吳



孝婦之孝貧皆徹骨葬不樹封既已沐德於表揚但有同心於感激願回大惠用廣弘施借冰壺之水以薦貞魂垂瑤島之雲載光霽屋真如不肖之自受豈直朋錫之可言

張仲玉許配陳舜位位早夭玉年十八聞訃謀歸陳親難之玉泣曰父母爲玉受聘玉卽陳家婦矣遂奔夫喪廟見拜姑畢將以身殉姑率諸妯娌勸止因忍死將事括髮去飾避人獨棲辛巳正月鄰家火玉身憑夫櫬願與俱焚忽風逐火滅玉屋獨存戊子六月六日大師壓境縣民奔竄玉獨守樞懷刃以待明日兵入姑指前令于可舉旌扁示之兵義焉爲白將領懸令表識於門他兵遂不敢入一日

連江縣志

卷之九

列女

三

病篤語姑曰死後衾斂毋經男子手必擇賢以繼夫篋中所積紡績金願爲營壙與夫合葬妾事畢矣遂卒

國朝吳菊姐吳于祚之女及笄許配黃廷棟黃孤而貧不能娶同幼弟營生於外以勞病斃女誓不改志旣而有議婚者輒色變泣曰今日之兒非父母無依今日之父母亦非兒莫侍何他圖焉蓋于祚年老未有男子故也自是爲父母治家經營喪葬旁求繼嗣以節孝終其身

林氏游邦直未婚妻也邦直嗣父日臨早亡其婦奔喪殉死因擇直以嗣及長聘林不及娶亦卒林遂歸游將如姑



故事時祖姑在堂泣止之曰往吾尚壯苦爲子撫嗣孫今老矣不能爲圖若死游氏之血食其終斬乎不得已忍死守事祖姑至孝立嗣子而教之長爲婚娶隨舉數孫居身謹嚴斬斬不出面老猶闔門邑士爲之顙旌有曰揆茲畢志殉夫之誠實視烈姑如一致論其獨力綿祚之計以較往事爲尤難雍正間建坊於門

吳氏鶴與人許配林禮如聘禮未備禮如素業於海有吳灼者誘入番舶飄外洋不歸吳年十六誓不別託竟歸林以守逾二年舅姑亦歿邀鄰嫗黃氏與居共力紉績以贍

連江縣志

卷之九

列女

三

其生冰操凜烈族里肅然敬之

藍驚小北番藍知初女許配白鶴陳光順未幾順死藍聞訃絕食數日父母知其志許以守節及夫小祥遂縞衣素輿而至由是甘於食貧執婦道惟謹空幃獨處恬無戚容章德梅舉人章廷簡女陳顯達之子婦年十六陳氏子兆鎮聘焉未幾鎮卒章年十九奔喪貞守以禮自閑屏處深閨尼媪不得望見歷三十年一節

論曰嘗疑禮經論女子之未廟見死者曰歸葬女氏之黨示未成婦也未成婦宜不繫於夫者又曰女死夫奔往哭



不莛杖不莛履夫既不繫於夫如之何其奔而哭之也取女有吉日而女死壻齊衰而弔既葬除之夫既不繫於夫如之何其齊衰以弔也然則後世談禮者申前說而不取乎未嫁不改適者斯亦過矣連之諸守貞者皆未成婦也而以婦之道自居抑以婦之事自任而夫且甚待之昔孝感之貞者云義自盟始此其言足以解聚訟之紛而破拘墟之滯諸貞也其揆心理而符者歟

明蘇六娘定海人年十六許配黃舜舉舉夭死蘇聞訃泣奔其喪父母逼之歸遂自縊有司旌其閭曰處女永貞

連江縣志

卷之九

列女

三

國朝楊聯姐安德里人楊賢生女幼而楚楚見人無飭貌而端莊出於自然年十五許配庠士游价人嗣子日臨未幾游氏子病瘵丙寅四月益篤女請以身歸游侍湯藥父母不許卽不食私治一繩藏之凶問至卽投纆母趣救之甦父婉諭曰壻無父母擬嗣其伯慮不足依也女曰死爾諸母皆前諭之不聽衆知其志決聽歸游女理妝潔裳裙笑言款款翻然登輿至游門拜祖先已問死者柩安在曰旣埋矣仰天一長吁問靈榻尚存乎引之入室取杯酒三瀝榻前价人出慟哭頓足謝曰我家何德乃辱賢婦至是



父指曰此嗣舅也女下拜始一掩淚隨出腰間繩命樹於  
樑語父曰吾命止午刻今至矣求父扶之升几拔一簪橫  
貫繩端以頸繫繩去几叉手懸空左右轉者再氣絕兩手  
始下垂觀者同聲雨泣莫能仰視陳元登爲作傳康熙二  
十五年奉

### 旨旌表

附陳元登詩云香爐峯高高入雲鶴蓋盤盤下錦  
裘金母遣將萼綠女符傳紫府紫陽君鈞天帝宮  
推墜地神仙亦爲綱常計絲絲按取一條繩猶把乾坤四  
維繫女媧煉石能補天故令巾幗反多賢老夫羈旅千行  
淚空洒西風向杜鵑隔歲歸來拜漆燈素帷香  
施月如冰知他雪魄雲容在飛上瑤臺十二層

黃懿姐許字陳汝敬汝敬長樂人家於連辛酉秋未婚而

### 連江縣志

#### 卷之九

列女

三

天女年十五聞之怏怏及後漸有知乃數涕泣媒氏謀爲  
改聘而女不知丙寅五月陳母廉其事徑造女家女疑焉  
執成婦禮出見相對悲不自勝少頃延姑於房詢所來姑  
曰聞爾改聘吾來取聘錢矣女大慟曰有是哉亡人不幸  
乃以妻爲市因語姑曰幸少待之兒得爲計女先失意久  
竟歲不吐一言至是留姑宿盡吐所欲言隨取所受簪珥  
奉姑曰留此如見兒也詰晚姑辭歸女泣送於門返卽沐  
浴理髮夜靜改著新衣竟引刀自截其喉未斷復終之氣  
乃絕泊曉家人驗其屍蓋有截痕三云

陳潤嘗爲傳之因  
論云先是魚山楊



氏女聘於游未婚而夫夭楊氏慷慨以殉女問之問年幾何或曰二十矣女私計曰吾年亦二十死何遲踰月遂有是事或曰女之濡不若楊之決予曰不然夫楊女年已長識且定故夫歿不難自決女不幸失夫時齒方幼未諳大義迨事變已更中心悼恨操刀從之等死耳浸假楊夫歿於辛酉之秋而女夫斃於是歲之夏易地當必其然何分濡決哉近候陳龍淮先生於嵩山精舍先生出郡中諸先正挽章並作雙烈不下軒輊蓋皆有見於此矣

盧氏女桂林人父娶繼母攜其前夫子廖某入盧與女爲瓜葛婚後女長而繼母死父有異志謂廖子貧將以女爲里中陳家婦而爲廖子更娶女不從趣廖子歸謀諸族以禮來迎廖愚懵不能爲計已而陳將娶之遂自縊死父畏公議隱其事鄉人義而哀焉何其偉爲之傳

連江縣志

卷之九

列女

三五

孫新姐洪塘人孫苞升女年十九許配山藏陳英健健奇醜人爭謔之女曰命也癸未夏英健溺水死訃至將奔喪以殉父母阻之不得行却水漿七日不死遂縞素持喪絕語笑至七月十四日託言沐浴閉戶經於暗室鄉鄰爲籲有司旌之先是孫之姑歸大塢林增慶慶死於溺姑亦嘗自縊龍江劉寵爲作孫氏二烈傳贊

鄭倫姐鏡路人鄭君任之女也少孤善事其母年十五許字諸生陳錦標陳孤且貧莫能備禮持二釵定約而已未幾以苦學病死女聞訃卽求往殉母力止之兄嫂俱至前



曲爲寬譬不聽母因大慟仆地蘇復絕蓋以孤故憐愛之  
不忍舍也女長嘆曰阿母愛我乃以誤我人孰不念其親  
但使我苟活人世使人稱失節婦則不孝大矣且事卽不  
至此一二年間我當歸陳安能長事母耶然母終冀可挽  
明日徧召鄰媪開導多方女拒之益力焚毀簪襦示必死  
兄泣曰妹之志決矣終當死遲且無名盍從所之乎母無  
柰何始趣具乘呼與訣哀不可止女辭母方涔涔下淚時  
乘肩輿由邑南門入至陳家行告廟禮畢拜柩前徐曰郎  
且成人不可以無後誰與嗣者伯姒攜嗣子出再拜女使  
墜亟趣易繩復縊而氣絕

連江縣志

卷之九

列女

三

近摩其頂徹所飾二釵畀之二釵者陳氏之定約於鄭者  
也於是起振衣出袖中繩繫樑乃就縊女素頤碩繩絕反  
安定去會城將二百里事不通聞訃至家人秘不發女偵  
知之遂欲奔喪父謂壻家無以守今數逾日夫柩在否不  
可知事且無及力阻不令行女哭泣窮晝夜竟飲酖以死  
吳淑姐吳璧功女許字庠士趙讓賢未婚賢渡江溺死訃  
至女方坐機織布未竟尚三尺餘從容就織乃下機理裳



衣以殉趙請父母及諸母泣勸不荅亦不食閱五晝夜奄奄欲盡知不可強乃許其行臨發家人環立雨泣女不一下淚徐謂母曰兒身許趙當以身從無以爲憶也至趙門行婚謁禮畢呼嗣男出予之一簪使守宗祧遂引繩自盡林菊姐林仲欽之女性素慧將笄失母弟幼凡井臼滌灑紉緘皆出其手父與祖母皆賴之許字諸生陳常喜之子淡父母俱亡貧不能成婚菊年已二十三及有吉期淡忽病癱不起家人戒勿使知菊微伺而疑之詰侍婢乃以實告女毅然曰吾以身許陳則歸陳而死義也姑姊妹勸阻

連江縣志

卷之九

列女

三

之弗聽明日竟至陳門行禮畢投繯以死

陳容姐館頭陳允定女也許配合北里竹岐鄭子章雍正癸丑春子章死女年十六志堅從一欲往殉之父母及諸母百方勸止終不易念越六日遂造鄭氏從容縊死孫氏百勝人少與同里葉起雖定婚雖病夭孫年二十一將往殉家人強留之憤不食數數求死卒聽歸葉入門大勸引刀自截而絕

林蘭姐太學生林名煊女祖母游氏以節立女習內訓知大義許字諸生黃鳳彩歸且有日適鳳彩母逝未克婚而



彩終三年喪以勞成瘵女聞之欲歸黃侍湯藥父母將許焉會有以壻病差起告者因中止旣而凶信至女遂決於殉父母兄弟止之持義終不易母徐諭曰今功令方禁未嫁者殉死無名曷如爲黃氏守若爾祖母之於吾家者庸詎不足以謝壻乎女曰不然昔祖母遭釁時曾祖父母俱存其不死得依姑以守耳今女已無姑又無他妯娌共處生而待撫於翁禮歟且女亦得行志斯已矣名非所知也於是知不能挽遂送以行至黃門以吉服行廟見禮畢引詣屍所時方未斂女入房中拜拜已顧侍婢取素衣來今連江縣志

卷之九

列女

三

當易服婢出亟闔戶出袖中繩繫牀就縊衣至排戶入而氣絕矣女自鳳彩之病預治繩欲死者數身迴旋二親側而神氣先盡故一舉手間命致志遂無所難如此  
陳招姐外浦人陳鴻楚女許配張光娘娘素業於海以漁溺死女聞晝夜悲泣念夫家貧無以終節逾月閉戶經死李引姐字東坪陳日秀未婚溺水死引姐至夫家自縊論曰女雖未成婦而相知也以行媒交親也以受幣義非無所屬者則變故之興度可守而守不可守而死之於行不毅然中正者哉蘇六娘以下諸烈遭禍釁而不恤其躬



非誠輕於一擲也夫亦苦心極慮計有窮於所自處者焉而欲旋其念以覩然於世則又斷斷不爲也其見真其行決芳齡弱質蹈履恬如而天地之綱常寄之彼士大夫之辜恩重眷延息殘年至裂其身名以終者視之得無愧歟國朝游端容庠士吳捷妻幼讀女史嘗慨然曰此豈獨古人事哉適吳姑寡性刻能得其歡順治丁亥明末監國師駐連江夫姪吳質因之起事容憂曰禍未艾也大兵將至趨夫出避謂家人云昔憂在國今憂在身矣先一日赴後亭池死

連江縣志

卷之九

列女

三

趙錦姐陳達如妻勤於治家兵將至達如謂趙曰若計安出趙曰妾夙聞祖訓以節義自閑事至此惟死以報君因泣勉女壽姐善事爾父女曰母死兒何忍獨生且兒亦女也不可辱泣拜其父偕母先一日赴江死

陳敬姐庠士吳際翔繼母兵迫謂婦游端宜孫婦邱貞姐女孫順姐等曰事至此寧舍生完節毋自玷辱家門貞姐泣曰有死而已遂自縊順姐奉繩長跪母前求縊端宜引繩手不能舉旣而曰汝得死所吾復何惜極力舉之女呼母者三氣絕宜亦就縊敬姐撫三屍慟曰汝等爲吾門立



節吾何忍棄汝獨活亦投繯死

按難日陳與其家婦女避兵重樓兵見邱氏姿色欲

攜以去邱死抵不從忍受慘搥大姑及姑環相捍衛兵又欲犯游游亦以死拒兵知其烈乃掠簪珥去得脫邱恐終受辱以周歲子喬哥託乳母遂自經邱氏際翔長子肇元之妻庠士春興女也於是際翔妻與女順姐相繼經死陳亦從之順姐時年十二許聘幕浦庠士陳國驛之子兵未至聞父言兵氛之慘數求決命藥自備父未之子至是竟死嗚呼一門完節慘莫如此家賢亦莫如此家矣

董氏庠士劉鼎烈妻烈家貧立志嘗日午未爨董無憂色

謂烈曰古來名公巨卿多起寒困君其勉之丙戌避地秦

川夫鋤於園婦紡於室宛然梁孟風丁亥海氛颺起烈以

秦川為必由地因返故里未兩月而兵入城董謀自全策

連江縣志

卷之九

列女

四

烈曰惟死可以免辱董即抽刀自剄未終烈為成之烈亦

剄焉

按烈字毓龍古心質貌精楷書嘗客於董忠介公公深器之

孫氏王燮妻歸未暮夫卒願以身殉家人勸諭百端姑亦

悲涕相慰乃止自是朝夕守柩哭泣日居一室雖三尺之

童不得窺其面母憐之時趣歸辭曰恐非未亡人所宜也

兵至別姑辭毋赴井以死

蘭居姐章時葆妻庠士蘭蕙女少穎異適章凡極叢積之

事入手了然無難兵至同女訓姐死泮池中訓姐年十三

陳氏章日孟妻性剛烈聞難與日孟妹啓姐約同死遂殺



其幼女因自到啓姐年未笄亦從以到

孫淑英庠士林翼昭妻昭得疾孫夜拜北斗祈以身代經年衣不解帶昭死卽不欲生嗣姑周氏泣慰之乃止苦節二十餘年兵薄城拜辭嗣姑曰婦從此訣矣以子託姑馳奔母家兵入遂赴井死弟婦孫賢妻從之

陳氏庠士吳光祚妻教授陳祖念女也夫耽飲不修家計陳以織紝供食極憔悴無懟容夫卒人疑貧當改節陳勵志彌堅難作投井死

吳粹茂庠士陳雲金妻吳萬仞女也吳本素封姊妹競尚

連江縣志

卷之九

列女

四

新姓氏獨荆釵布素人或笑其鄙者曰荆布性所安也及適陳賢於諸婦稱首難日避匿荒室中聞四鄰淫掠聲謂諸姒曰不決辱將及遂赴井死時同赴者六人

陳瑀姐陳坤亨女雲金妹也許字庠士林肇乾子時同赴井者六人瑀先焉年十四

陳氏庠士吳駿聲妻孀居二十年冰素如一日至是次雲金妹投井死

李氏吳孔鉉繼室會城人年十七歸吳未暮夫死父欲攜之歸氏泣曰婦道嫁則從夫今夫肉未冷何忍歸况堂有



發姑兒得所歸父勿念也時家衆紛囂氏屏不接以駿聲妻寡而賢日與相依閉戶持誦而已兵入同赴井死

孫氏太學生陳宏謨妻也素警敏理家有方難日聞夫被獲同妾泣拜於天祈免夫禍卽繼姪婦雲金妻吳氏赴井妾許氏從焉許氏會城人時年十八

林進姐庠士蘭夢麟繼室容麗而性溫撫前子如已出夫卒哀幃中聞兵薄城與其家諸婦謀曰兵入必難潔身不可不死但當死得明白乃無愧九原耳城陷遂自剄

林氏蘭申妻卽夢麟姪婦也與夢麟妻同日到死

連江縣志

卷之九

列女

四三

林四姐林昂之女族叔鳴鳳依前明餘燼據連索餉富室多苦之大兵至鳳欲匿其家乃出戰女時年十四美姿容善舉止嘆曰匿將安之禍由我家使闔邑被其難天道神明獨完可乎女蓋顧鳳所爲不能止心常憤之也城陷自投胥井鳳亦死於亂軍

鄭郡姐候官貢生鄭班熊女也幼通書史尤善弈丁亥春從母吳氏歸連省其舅道梗不得歸聞變盡脫簪珥授其母辭覓死所母以兵尚未逼止之女曰幸未逼猶得爲計若其逼身雖死無及夜坐井旁兵入遂赴焉



陳玉姐周國學妻學死家貧獨與女姪靜姐習績紡度日  
兵至相引匿暗室聞淫掠聲靜姐曰事勢若此宜早決矣  
因指屋旁汗池問此堪死否慮其淺也陳謂吾聞赴水者  
以面撲地卽死靜姐如言陳亦從之俱斃靜姐許字楊承  
鎰死時未笄  
張寧姐庠士吳一凱妻九翼之妹凱得羸疾張備極承奉  
繼姑善怒時柔聲事之恐妨凱疾常夜銜乾棗鷄鳴取以  
啖凱踰年精耗骨立而凱始蘇兵入赴井死

林氏楊承鐸妻幼孤育於伯父能立志足不出戶歸楊深  
有內德夫病暈每發常竟時氏承奉十餘年嚴寒疾作日

連江縣志

卷之九

列女

四

夜侍側不少懈難日投河死

陳氏庠士游子騏妻陳元標之女夫得癆疾伏牀數載氏  
百計爲生數鬻服飾資湯藥惟恐夫知之難日自經以死  
林氏陳承高妻庠士林是藩女秉操幽靜雅以禮自閑兵  
入聞夫被獲泣曰若死何用我爲薄暮望夫不歸從樓上  
躍入鄰家池死

蘭氏孫肯獲妻避難密室聞夫爲兵拷掠奔出謂兵曰吾  
夫貧儒也何有金帛盡出簪珥求贖夫生兵疑有餘藏猶  
楚撻其夫不已氏極力以身掖衛兵怒而刃之夫得釋



林氏庠士吳兆鯤妻性樸素終身不得於夫能以婦道自持賢爲吳氏諸婦冠兵入被獲詰夫所在給以遠出篋榜竟日終不言乘間奔井死

林氏楊承宣妻也兵拷其夫急氏出救因欲污之以死相捍遂受刃子兆熊抱母屍慟哭觸階死時年十九

張氏孫毅之妻毅得勝疾氏奉承不倦兵至毅爲所執不堪鞭撻氏極力衛夫兵因拘之恐汚奔入井死

林氏游僕妻素安貧約能以義命勉夫時夫爲兵獲懸拷金帛氏挺身出救兵欲攜以去奔入池死

連江縣志

卷之九

列女

四

何氏陳承禮妻承禮痛父爲兵慘拷莫知所措計無以脫父於危號泣投井氏悲夫死絕食七日進水作嘔終焉  
張氏林琛妻避難別室及夫被兵拷急奔出衛之兵刃其夫痛哭抱子赴井死

黃氏庠士黃維元女琛子志第之妻歸林未數月從姑死於井

張氏楊八妻夫亡撫幼子以守兵入與子登樓避之被獲泣曰吾之隱忍未死者欲存楊氏一塊肉也今已矣遂抱子墮樓及城時城下江水正漲復從城上投江屍逐水流



三日隨潮復上子猶在手顏色宛如生時

凌氏林明夏妻德容修潔夫甚貧拙氏勤治女工奉姑無怨容兵入強擄以行求死無路至郭督學祠前給兵曰吾實汝從盍稍寬我兵信之釋其繫氏猝取石斧劈兵顱血流仆地繼至者大怒叢刀棚其下體命絕是夜魂歸訴姑告死所哭聲繞屋又聞其向竈吹火天明廚前石有血跡逾日始求屍瘞焉

某氏避難 文廟兵見其容麗欲犯之堅拒不從因威以刃冀其怵也婦曰有死而已宜速殺我兵轉爲甘言誘之

連江縣志

卷之九

列女

四十五

婦益厲以頭搶地而詈兵無如何因謂諸繫者曰汝勸之行吾盡釋汝衆乃前問若誰家女爲誰氏婦婦詬曰問何爲也爾輩不能自守反欲誘人受污乎日暮知不可脫亂拾石斧抵兵祈殺已兵見不回乃刃之猶未忍殺婦仰承其刃而喉斷矣

陳圭姐孫某妻庠士陳九霄女性恬素夫爲蕩子嘗數月不歸圭坦然肄業憂怨不形人皆嘆其賢悲其遇之蹇也久之夫盡破其產謀及簪珥氏但出所有不較難日被刦至城上乘間躍城下兵恨投以巨石猶匍匐赴江以死



孫酉姐林翥之妻性貞靜能孝敬舅姑難日以幼子託姑將赴水俸爲兵獲給之曰我有金藏之家願以奉贖兵信之邀至中途遇井奔入

孫氏庠士陳聘妻孫如蘇女依父避難父爲兵獲拷索奔入井氏倉皇出視兵欲污之以死拒兵怒傷其喉不從復刺之腸迸孕見匍匐赴井殞於井旁

徐氏梅燧春妻儉而能勤夫家以立難日與叔姒林氏相邀投井死

孫氏吳道成妻也孀居十餘年以女紅自給兵入赴井死

連江縣志

卷之九

列女

四六

游氏陳子禎妻性甘淡約善持家難日攜幼子立井旁兵至遂投井子見毋墜亦隨入焉

蔡氏庠士陳九重妾也年十四入陳門嫡吳氏處之每不情氏常婉容接之又能以禮自處至是避兵密室爲所獲獨悲泣求死兵不能逼乘間遂奔入井

某氏白沙黃守禮妾也以夫命問所親於邑之陳家城閉不得出偕陳家婦潛匿避兵已而聞慘掠聲恐辱及身乘夜赴井死

陳氏劉璧妻璧業醫能爲之內助家素雍和兵至入井死



孫氏鄭訊妻庠士鄭昂嫡母也撫昂如已出人多賢之難日赴井死

卓氏陳仕策妻同叔姒林氏叔子有珙聞難並投於井策出其翁婦及姪而氏竟死

鄭氏王英聚妻難日入井死

某氏張九妻難日投河死

某氏夫為竹工兵入以大箕覆衣飾身刎其上

陳氏庠士陳墀婢出嫁為農家婦難日為兵所獲將污之不從赴水死

連江縣志

卷之九

列女

四七

露錦陳士楷婢年方笄兵入赴井死

陳妹妹林架婢縣後農家女也年十四從架母游氏避難外家兵至奔入井

游時祺作鳳城烈女傳所載戊子死節者甚詳其族子游式訓序云 皇朝定

鼎燕京人心効順故王師之入閩也傳檄而已邑無兵擾室家晏如洎丁亥海氛告警八月二十日連邑陷焉明年戊子六月六日復連之兵屯劄近郊七日入城以連民失守因縱淫掠一時婦女挺然以節烈相先嗟乎致命遂志所難期於衣冠讀古之流乃以目不識一經足不踰數武之婦人女子竟能守貞抱潔不肯免微污以苟免豈不難哉豈不難哉予聞斯傳共載五十有七間為節婦者八人為閩女者七人妾三人婢女二人是果天性之自然歟抑本於父兄訓誨之所成歟抑得於夫家恩義之所厲歟然考於所載皆其平日為女而能孝事父母者也為婦而能敬養舅姑者也為妻而能誠一以事其夫者也寡守而能動遵禮節清靜不少渝者也夫惟居常有孝敬守禮之賢



遭變乃有貞烈不辱之節其植立者素故成就者全何待躬禍難而見哉予因之有所望焉夫貞臣烈女無代無之而不揚不顯不獎不勸士君子亟揚之以待採風之所及而弘加獎厲焉庶亦教化之所資風俗之一助焉爾

明林金小壺江林熹女年十二歸連江鄭輝生一子嘉靖四十二年倭入壺江金小適歸寧與妹玉小扶母登舟避之賊突上其舟金小恐污亟以子子母偕玉小投江死

國朝陳慈姐諸生陳蓋瀚女許於孫未字丙申秋海上烽烟復起女聞警謂父曰勢且急計惟外而出則可以生不外而出則不可以生盍先爲圖父是其言時城禁嚴無從也惟以臨難不辱謂子勉之八月四日城陷女爲寇獲迫

連江縣志

卷之九

列女

四

以行不從力摔之母號泣抱奪不得女訣曰在女惟兒在男惟兒命之衰矣報德罔極挺身與觸見殺途中年十五吳玉姐諸生黃元吉妻素有烈性吉每爲肅然聞亂謂吉曰明早爲陳太姑諱辰今當整饌先嘗明日爲妾死日終得耐太姑之享城陷被獲三賊環擁之投地而呼奪刀觸抵遂被刃死時年二十六吉收其屍賊慰謝曰英雄婦也鄉人烈之助瘞具後每夜呼死所如鬪殺聲吉作詞弔之

乃息

何其偉有寄鏡詞序云黃文森內人死烈亂中余內爲存其鏡貽詩一首歸之詩云尚有菱花不減輝新

妝幾度拭羅衣雖然無復嫦娥影不似他家破月歸



林雲姐早失父與母癯居年十五許聘吳其素子卽玉姐弟也難日被獲佯爲病狀徐行不數武遇井給寇曰終當從汝少緩余行因憇井側遽躍入死之

陳儀姐邑胥陳志蕃女秉性端嚴美姿容精女工賊將至避匿土窖中難日窮搜見獲迫以他去泣謂母曰自今不見母矣與老父幸自愛勿以兒爲念賊置之別所自朝至昃霜刃橫加終不屈以死年十八

林氏陳用建妻戊子城陷同伯姒卓氏赴井尋救出見夫傷刃以身衛之兵欲攜之行復投汗泥中兵怒擊傷其首

連江縣志

卷之九

列女

四

以去至丙申被獲寇將犯之氏叱曰吾肯失身何見傷於戊子之歲遂與子有典同遇害

章氏林如錦妻庠士章鼎姊也夫夭死柏舟自矢丙申八月聞亂挾毒自隨及爲所獲陰嚙毒取水數啜隨死

劉珠姐林仲蔚妻適林載餘行依婦道聞警謂蔚曰行矣無以妾累雖然妾之爲君生婦日短爲君死婦日長也蔚聞之惻然難日爲賊所獲扃於孫家樓不受污自經以死趙瑯姐庠士趙元亮女也靜一端莊年十八歸孫瑩敬戒自將及難迫瑩謂之曰身不可失子不可棄將若之何荅



曰與子偕匿其免家之福也不免以死繼之抱周歲幼子謀哥避於農舍寇大至懼不免以子屬婢曰若念主母恩爲我善視之吾不反顧矣遂投井以死年二十二

黃連姐晉江人蔡錫蕃妻也食貧無戚容常以勤勗夫以

勞自克難日不受辱與蕃姊引姐俱投廁死

黃元吉贊云烈之死較諸

投井者何清濁相戾也豈死亦有幸有不幸耶噫鋌而走險急何能擇諸烈有靡他之心雖不遇井如廁類者其死所矣黃氏有不奪之志苟不遇廁如井類者亦其死所矣故得井而死以清形清而清見得廁而死以濁形清而清亦彰皆可表表於世云

陳氏巽山林可金妻海寇掠諸鄉氏奔逃於大崙龍潭賊

### 連江縣志

#### 卷之九

列女

五

衆四出追掩將迫近恐不得免遽投潭以死

薛恭姐定海張揚輝妻僑寓幕浦堡家貧相夫操作無詬

誚聲戊午海舶攻堡輝謂婦曰寇迫將如爾何薛曰老姑

幼子君其圖利之妾知所自處矣堡陷登草樓以大帶雉

經椽上死時年四十八

張氏王承禧妻順治戊子大兵入城懼辱其身奔投儒學

後河溺死

論曰凡人有倉猝之遇無倉猝之心變形於眉睫身可舍而必不可以辱非其心之素定未易強而能也連當前明



革命亂方未定莫知適從既苦兵旋患寇崑岡之災無分  
玉石而傾城婉變受禍彌深然考於其時多抗節完貞遇  
變不奪或智井以湛軀或衣帶以授命或骨碎清風之石  
或屍浮白首之河以至事決代烹則當熊蒙難志存蹈刃  
則料虎櫻危率皆慷慨激烈匪謀而合嗚呼藉非有素定  
之心何以能恬於所受如此哉稽戊子丙申間邑治死難  
之女得可存者六十九人爰掇前後有聞者附焉皜皜凜  
凜彼此爭輝此子政之圖所不聞而蔚宗之史所未有也  
夫扶輿磅礴之氣偉人傑士不能以獨當而閨閫之流亦  
連江縣志

卷之九

列女

五

常挺英而萃秀然遇非大變則節不大彰觀於諸媛何不  
幸生於連而受禍者烈又何幸生於連而著節者奇歟  
明魏六姑岱雲處女也年十六父大椿病死母遺其孤綺  
而嫁時綺方周歲六姑朝夕持以泣知不可他託遂閉妝  
不字竟撫躬終其身綺後衍至千餘指皆六姑之貽也魏  
氏至今歲時祭之稱在室六姑云  
論曰漢太尉李固之嬰禍也其女嫁南鄭趙伯英憂父滅  
門謀匿弟燮於父門生王成後遇赦而李氏得有後君子  
聞而避之魏六姑父死母出念弟幼無託將不獲全決志



不嫁以爲之撫雖所履不如李之危而躬當其任抑又難  
焉其賢孝均非尋常匹也故使李女未嫁必能行守貞之  
權而魏女旣嫁亦能爲蹈危之舉境易則其致一耳或者  
謂二者存亡其重輕固殊焉雖然重輕者自人視之而別  
也爲之女者固皆重之而不見爲輕也夫論人者得其所  
爲心而已豈必以事之重輕計哉

國朝安德里有婦失其氏夫以調遷失業貧不能存因鬻  
之於會城執不可夫力強之乃曰行矣念夫婦恩幸遂及  
郊及出南關渡長橋忽從輿中躍出投大江以死

連江縣志

卷之九

列女

五

論曰言士行之醇今不如古言女貞之美亦古不如今史  
稱御者之妻恥其夫請去至漢遂有若朱翁子之婦者噫  
何風之薄也安德婦人夫以窮而鬻之乃逼而不行行卒  
不越境以死由是觀之奚古今不相及乎

